

“Агробанк” АТБ
Кенгаши йиғилишининг
2016 йил “ 1 ”июндаги
9/1 - сонли қарори билан
“ТАСДИҚЛАНГАН”

“Агробанк” акциядорлик тижорат банкининг
Ахборот сиёсати тўғрисида
Низом

ТОШКЕНТ-2016

- 1-§. Умумий қоидалар**
- 2-§. Асосий тушунчалар**
- 3-§. Ахборотлар сиёсатининг асосий мақсади ва вазифалари**
- 4-§. Ахборотлар сиёсатининг асосий тамойиллари**
- 5-§. Ахборотларни ошкор қилишда қўлланиладиган воситалар**
- 6-§. Ахборотлаштириш ва ахборотни ошкор қилиш шакллари ва йўллари**
- 7-§. Мажбурий ошкор этиладиган ахборотлар рўйхати, тақдим этиш тартиби ва муддатлари**
- 8-§. Қўшимча ошкор этиладиган ахборотлар рўйхати ва тартиби**
- 9-§. Эркин ошкор этиладиган ахборотлар рўйхати ва тартиби**
- 10-§. Банк томонидан ошкор этилган ахборотларга изоҳлар бериш**
- 11-§. Ахборот ошкор қилишнинг бошқа кўринишлари**
- 12-§. Банкнинг расмий веб-сайтида ахборотларни ошкор этиш**
- 13-§. Бошқарув органлари аъзолари, мансабдор шахслар ва ходимларнинг мафаатдор шахслар билан ахборот алмашинув тартиби**
- 14-§. Ахборот сиёсатига амал қилиш бўйича назоратни таъминлаш чора-тадбирлари**
- 15-§. Яқуний қоидалар**

1-§. Умумий қоидалар

1. Ушбу Низом Ўзбекистон Республикасининг “Банклар ва банк фаолияти тўғрисида”ги, “Банк сири тўғрисида”ги, “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги, “Қимматли қоғозлар бозори тўғрисида”ги Қонунлари, Ўзбекистон Республикаси Президентининг 2015 йил 24 апрелдаги “Акциядорлик жамиятларида замонавий корпоратив бошқарув услубларини жорий этиш чора-тадбирлари тўғрисида”ги ПФ-4720-сонли Ўзбекистон Республикаси Вазирлар Маҳкамасининг 2013 йил 31 декабрдаги “Ўзбекистон республикасида ахборот-коммуникация технологияларини ривожлантириш ҳолатини баҳолаш тизимини жорий этиш чора-тадбирлари тўғрисида”ги 355-сонли ҳамда 2014 йил 2 июлдаги “Акциядорлик жамиятларида корпоратив бошқарув тизимини такомиллаштириш чора-тадбирлари тўғрисида”ги 176-сонли қарорлари, Адлия вазирлигида 2012 йил 31 июлда 2383-сон билан рўйхатга олинган “Қимматли қоғозлар бозорида ахборот тақдим этиш ва эълон қилиш қоидалари”, Акциядорлик жамиятлари фаолиятининг самарадорлигини ошириш ва корпоратив бошқарув тизимини такомиллаштириш комиссиясининг 9-сонли мажлис баёни билан тасдиқланган Корпоратив бошқарув кодекситалаблари асосида ишлаб чиқилган.

2. Ушбу Низом очик ахборотларнинг ошкор этиш мақсадлари ва тамойиллари, банкнинг расмий веб-сайти жумладан, бошқа ахборот каналлари орқали ошкор этилиши мажбурий ҳисобланган маълумотлар рўйхати ва уларни ошкор этиш тартиби, муддатлари, шакллари, шунингдек,

банк ходимларининг очик маълумотларнинг ошкор этилишидаги мажбуриятлари, банкнинг бошқарув органлари, мансабдор шахслари, ходимлари билан манфаатдор шахслар, жумладан, акциядорлар, инвесторлар ҳамда оммавий ахборот воситалари вакиллари ўртасида маълумотлар алмашинув тартибига ахборот сиёсатига риоя қилинишини таъминлаш бўйича чора-тадбирларни белгилаб беради.

2-§. Асосий тушунчалар

3. Ушбу сиёсатда қуйидаги тушунчалардан фойдаланилади:

а) **Манфаатдор шахслар** - банк фаолиятидан манфаат кўрувчи шахслар, жумладан, банк акциядорлари, банкнинг салоҳиятли инвесторлари, қимматли қоғозлар бозорининг иштирокчилари;

б) **Ахборот** - тақдим этиш шаклидан қатъий назар бўлган маълумот (хабар, ахборот);

в) **Ошкор қилиниши мажбур бўлган ахборот** – амалдаги қонунчилик талабларига мувофиқ ошкор этиладиган маълумотлар;

г) **Масъул шахслар** - банк фаолиятига доир ахборотларни ошкор этадиган ҳамда уларга изоҳ берадиган банк Бошқарув аъзолари ва ходимлари;

д) **Махфий ахборот** - Ўзбекистон Республикаси қонун ҳужжатларига мувофиқ фойдаланиш чекланган, давлат сирларига мансуб ахборот мавжуд бўлмаган ҳужжатлаштирилган ахборот;

е) **Тижорат сир** - учинчи шахсларга номаълумлиги сабабли фан-техника, технология, ишлаб чиқариш, молия-иқтисодиёт соҳаларида ҳамда бошқа соҳаларда тижорат қимматига эга бўлган, қонуний асосда эркин фойдаланилмайдиган ахборот бўлиб, ушбу ахборот мулкдори унинг махфийлигини муҳофаза қилиш бўйича чора-тадбирларни кўради;

ё) **акциялар нархининг ўзгаришига таъсир этувчи ахборотлар** – Бошқарувдаги ўзгаришлар (Акциядорлар, банк Кенгаши ва Бошқаруви), банк фаолиятининг молиявий ва даромадлиқ кўрсаткичларининг ўзгариши, дивидендлар ҳажми ва бошқалар.

3-§. Ахборотлар сиёсатининг асосий мақсади ва вазифалари

4. Ахборотлар сиёсатининг асосий мақсади – акциядорлар, инвесторлар, қимматли қоғозлар бозорининг профессионал иштирокчилари, шунингдек бошқа манфаатдор шахсларнинг банк ва унинг фаолияти тўғрисидаги ишончли маълумотларга бўлган талабини қондириш орқали банк фаолиятининг очиклиги ва шаффофлигини таъминлашдан иборатдир.

5. Ушбу сиёсатнинг асосий вазифалари қуйидагилардан иборат:

а) банкнинг ахборотлар сиёсатининг асосий тамойилларини белгилаш;

б) барча манфаатдор шахсларга банк тўғрисида ишончли ва ҳаққоний ахборотларни ўз вақтида тақдим этилишини таъминлаш;

в)барча манфаатдор шахсларга банк тўғрисида ахборот тақдим этиш коида ва тартибларини белгилаш;

г)банк ахборотларининг хавфсизлигини таъминлаш;

д)банк ахборотларининг ошкоралиги ва шаффофлигини ошириш ҳисобига банкнинг инвестицион жалб этиш қобиляти ўсишини таъминлайдиган қўшимча ахборотларнинг ошкоралик тамойилларини белгилаш.

4-§.Ахборотлар сиёсатининг асосий тамойиллари

6.Ахборотлар сиёсатининг асосий тамойиллари бўлиб, доимийлик, тезкорлик, қулайлилик, тўлиқлилик, тенг ҳуқуқлилик, тенглик, ахборот ресурсларининг ҳимояланганлиги ҳисобланади.

а)доимийлик – банк фаолиятига оид ахборотларни манфаатдор шахсларгадоимий тақдим этиб бориш;

б)тезкорлик – манфаатдор шахсларни банкнингмолиявий фаолиятига таъсир этувчи муҳим воқеалар ва фактларибилан қисқа муддатларда хабардор қилиш;

в)қулайлилик – манфаатдор шахсларнинг эркин фойдаланиши учун банк фаолиятига оид ахборотларни ошкор этилишини турли хил йўллар орқали амалга ошириш;

г)тўлиқлилик – манфаатдор шахсларнинг банк тўғрисида тўлиқ тасавурга эга бўлишини таъминлаш учун банкнинг амалдаги фаолияти ва учун салбий бўлган маълумотларни ҳам инкор этмаган ҳолда тақдим этиш;

д)тенг ҳуқуқлилик – банк фаолиятига оид ахборотларни олишда барча манфаатдор шахслар учун ҳуқуқларнинг тенглиги;

е)тенглик – банкнинг тижоратманфаатларини таъминлаган ҳолда банк фаолиятининг очиқлиги ва шаффофлиги ўртасидаги тенглигини таъминлаш. Бунда қуйидагилар таъминланиши шарт:

-махфий ахборотларнинг ҳимояланганлиги;

-инсайдерларга доир ахборотларнинг тақдим этилишида амалдаги қонунчилик талабларига амал қилиш.

ё)ахборот ресурсларининг ҳимояланганлиги –тижорат сирини ёки бошқа махфий ҳисобланган ахборотларни амалдаги қонунчиликка мувофиқ ахборот хавфсизлигини таъминлаш.

7.Қимматли қоғозлар эмитенти сифатида банк томонидан ошкор этилиши мажбурий ҳисобланган ахборотлар рўйхати ва тақдим этиш муддатлари амалдаги қонунчиликка асосан амалга оширилади.

8.Банк банк сирини доир маълумотларнинг хавфсизлигини амалдаги қонунчиликка асосан таъминлайди.

9.Банк ва унинг фаолияти тўғрисидаги ахборотларнинг тўлиқлиги ва ҳаққонийлиги бўйича жавобгарлик банк Бошқаруви зиммасига юклатилади.

10.Ушбу Низомга асосан ошкор қилишга мўлжалланган ахборотлар ўзбек тилида ошкор қилинади, зарур ҳолларда бошқа тилларда ҳам ошкор қилиниши мумкин.

5-§.Ахборотларни ошкор қилишда қўлланиладиган воситалар

11.Мазур Низомда кўрсатилган ахборотларни тарқатишда банк қуйидаги коммуникацион воситаларини қўллаши мумкин:

-аудиовизуал ташувчилар - видеороликлар, корпоратив видеofilmлар, теле ва радио дастурларда интервью бериш ва иштирок этиш, банкда ва банкдан ташқарида бўладиган мажлислар, конференциялар, маросимларда намоиш этиладиган слайдлар ва бошқа воситалар;

-ички ва ташқи мақсадлар учун тайёрланган ёзма ҳужжатлар - пресс-релизлар, нашр учун хабарлар, банк брошюралари, ходимлар учун информацион материаллар ва журналлар, оммавий ахборот воситалари учун мақолалар;

-оғзаки хабарлар - изоҳлар, интервьюлар, пресс-конференциялар, ички тақдиротлар ёки докладлар, барча йўналишлардаги оммавий тадбирларда чиқишлар;

-электрон материаллар - электрон почта, “интернет” тармоғида ресурслар, банкнинг интернет портали, ички корпоратив тармоқ ресурслари.

6-§.Ахборотлаштириш ва ахборотни ошкор қилиш шакллари ва йўллари

12.Банк фаолияти тўғрисида тарқатилаётган ахборот 3 гуруҳга бўлинади:

- мажбурий ошкор этиладиган ахборотлар;
- қўшимча ошкор этиладиган ахборотлар;
- эркин ошкор этиладиган ахборотлар.

13.Банк ахборотнинг тарқатилишида турли хил йўллардан фойдаланишни кўзда тутди. Энг аввало, кўпчилик манфаатдор шахслар учун қулай бўлган электрон йўл орқали. Ахборот тарқатиш каналлари банк томонидан ошкор этилаётган ахборотларни манфаатдор шахслар учун эркин ва қулай бўлишини таъминлайди.

14.Мазкур Низом талабларига мувофиқ банк ОАВ вакиллари билан қуйидагича муносабатда бўлади:

- банк фаолиятидаги ҳодисалар бўйича пресс-релизлар тарқатиш;
- банк раҳбарияти билан ОАВ вакиллари ўртасида пресс-конференциялар ва учрашувларни ўтказиш;
- ОАВ вакилларининг ахборот сўровларига тезкор ва аниқ жавоб бериш;
- ОАВ вакилларини таклиф этган ҳолда конференция, семинар ва бошқа оммавий тадбирларда иштирок этиш;
- банк веб-сайтининг тегишли бўлимларини доимий равишда янгилаб ва тўлдириб бориш.

15.ОАВда режалаштирилган чиқишлар, ундаги ахборот таркиби, мазкур Низомга талабларига асосан, шунингдек, банк Бошқаруви томонидан белгиланади.

7-§.Мажбурий ошкор этиладиган ахборотлар рўйхати, тақдимэтиш тартиби ва муддатлари

16.Банк томонидан ошкор этилиши мажбурий ҳисобланган ахборотлар Ўзбекистон Республикасининг “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги, “Қимматли қоғозлар бозори тўғрисида”ги Қонунлари, Ўзбекистон Республикаси Вазирлар Маҳкамасининг 2013 йил 31 декабрдаги “Ўзбекистон Республикасида ахборот-коммуникациятехнологияларини ривожлантириш ҳолатини баҳолаш тизимини жорий этиш чора-тадбирлари тўғрисида”ги 355-сонли ҳамда 2014 йил 2июлдаги “Акциядорлик жамиятларида корпоратив бошқарув тизимини такомиллаштириш чора-тадбирлари тўғрисида”ги 176-сонли қарорлари ҳамда Адлия вазирлигида 2012 йил31 июлда 2383-сон билан рўйхатга олинган “Қимматли қоғозлар бозорида ахборот тақдим этиш ва эълон қилиш қоидалари” талабларига мувофиқ амалга оширади.

17.Банк томонидан ахборотларнинг ошкор этилиши ва тарқатилиши куйидаги йўллар орқали амалга оширилади:

-Ягона интерактив давлат хизматлари портали (қимматли қоғозлар бозори назорати бўйича масъул давлат органи расмий веб-сайти);

-фонд биржасининг расмий веб-сайти (www.uzse.uz);

-банкнинг корпоратив веб-сайти (www.agrobank.uz);

-оммавий ахборот воситалари (ОАВ);

-интернет порталларида жойлаштириш;

-босма нашрларда чоп этиш;

-манфаатдор шахслар билан ахборот семинарлари ва бошқа турдаги учрашувларни ташкил этиш; (шу жумладан, телеконференциялар, веб-трансляциялар, веб-кастлар);

-амалдаги қонунчилик, банк Устави ва банк ички меъёрий ҳужжатларига мувофиқ акциядорларга ахборотлар ва уларнинг талабига биноан ҳужжатлар нусхаларини тақдим этиш;

-амалдаги қонунчилик, банк Устави, банк ички меъёрий ҳужжатлари ва банкнинг Бошқарув органлари қарорларига мувофиқ коммуникацион воситалардан фойдаланган ҳолда бошқа йўллар билан мазкур Низомда назарда тутилган ахборотларни ошкор этиш.

18.Қимматли қоғозлар бозорини назорати бўйича масъул давлат органи ёки фонд биржаси расмий веб-сайтида мажбурий ошкор этиладиган ахборотлар;

-қимматли қоғозлар эмиссия проспекти (қимматли қоғозлар барчага сотилиши кўзда тутилган ҳолатда):

-банкнинг йиллик ҳисоботи, шу жумладан, аудиторлик ташкилотининг хулосаси ва халқаро стандартларга мувофиқ тайёрланган молиявий ҳисобот;

-банкнинг биринчи чорак, ярим йиллик ва 9 ойлик ҳисоботлари;

-банк фаолиятига оид муҳим фактлар.

Банк юқорида қайд этилган ахборотларининг ошкор этилиш тартиби, муддати ва тақдим этиш шакллари Адлия вазирлигида 2012 йил 31 июлда 2383-сон билан рўйхатга олинган “Қимматли қоғозлар бозорида ахборот тақдим этиш ва эълон қилиш қоидалари” талабларига мувофиқ амалга оширади.

19.Банк қимматли қоғозлари фонд биржасининг котировка листингида кўйилганда ахборотлар амалдаги қонунчиликка асосан ошкор этилади.

20.Банкнинг расмий веб-сайти (www.agrobank.uz) орқали ахборотлар ошкор этилишини Вазирлар Маҳкамасининг 2014 йил 2июлдаги “Акциядорлик жамиятларида корпоратив бошқарув тизимини такомиллаштириш чора-тадбирлари тўғрисида”ги 176-сонли қарори талабларига мувофиқ амалга оширади.

21.Банк томонидан оммавий ахборот воситалари орқали ошкор этилиши мажбурий ҳисобланган ахборотлар;

-акциядорлар умумий йиғилишининг ўтказилиши тўғрисидаги маълумотлар;

-банкнинг манзили (почта адреси) ва электрон почта адресининг ўзгарганлиги тўғрисидаги маълумот;

-акция ёки эмиссион қимматли қоғоз сотиб олиш ҳуқуқига эга банк акциядорларига таклифлар;

-банк томонидан акцияларнинг қайта сотиб олиниши тўғрисидаги маълумот;

-банкни тугатиш тўғрисидаги маълумот, шунингдек кредиторларга бўлган талабларини кўриб чиқиш тартиби ва муддатлари.

8-§.Кўшимча ошкор этиладиган ахборотлар рўйхати ва тартиби

22.Банк расмий веб-сайтини инглиз, рус ва бошқа тилларда шакллантириш билан биргаликда унга манфаатдор шахслар учун қулай бўлиши учун барча ахборотларни давлат тилида ёки бошқа тиллардаги таржимаси билан жойлаштирилишини таъминлайди.

23.Банкнинг расмий веб-сайтида кўшимча ошкор этиладиган ахборотлар:

-корпоратив бошқарув Кодекси тавсияларига амал қилиш мажбуриятини қабул қилганлиги тўғрисидаги ахборот;

-банк Бошқаруви тўғрисида маълумот;

-банкнинг Бошқарув органи ва корпоратив бошқарув тизимининг самарадорлигини баҳолаш натижалари;

-банк акцияларининг 20 фоизидан ортиғига эгалик қилувчи акциядорлар тўғрисида маълумот;

-соф фойданинг тақсимланиш асослари, дивидендлар ҳажми ва дивиденд сиёсатига тўғри келиши, шунингдек, зарур ҳолларда соф фойданинг бир қисмини банкни ривожлантиришга йўналтирилганлиги бўйича тушунтириш ва иқтисодий асослар;

-акциялар котировкаси тўғрисида ахборот, шунингдек фундаментал ва техник таҳлил натижалари, мутахассислар, экспертлар ва маслаҳатчиларнинг прогноз ва шарҳлари;

-хайрия (ҳомийлик) ёки беғараз ёрдам кўрсатиш (олиш) бўйича қарор қабул қилиш тартиби ҳамда ҳақиқатда хайрия (ҳомийлик) ёки беғараз ёрдам кўрсатилганлиги (олинганлиги) тўғрисида ахборот.

24.Банк Кенгаши ва Бошқарувини мукофотлаш ва компенсация хажми тўғрисидаги ахборотлар акциядорларнинг умумий йиғилишида ошкор этилади ва йиғилиш баёнига киритилади.

9-§.Эркин ошкор этиладиган ахборотлар рўйхати ва тартиби

25.Банк мажбурий ошкоралик билан бир қаторда ўз фаолияти тўғрисида банк обрўйига ижобий ҳамда унинг акциялари ва бошқа қимматли қоғозларининг нархига объектив таъсир кўрсатадиган ахборотларни эркин ошкор қилиши мумкин.

26.Банк томонидан эркин ошкор этиладиган ахборотлар:

-банкнинг молиявий ҳолати ва фаолияти натижалари тўғрисидаги банк раҳбариятининг таҳлил ва изоҳлари;

-банк фаолиятининг устувор йўналишларидаги ўзгаришлар;

-фаолият натижалари тўғрисидаги чораклик қўшимча ҳисоботлар;

-банк тўғрисида белгиланган тартибда ошкор этилган ахборотларга ваколатли шахсларнинг изоҳлари;

-банк вакилларининг молиявий фаолият билан боғлиқ тақдимотлари ва чиқишлари;

-банк номининг ўзгариши;

-банк устав капиталининг ошиши (камайиши) тўғрисидаги қарор;

-аудитор, регистратор ёки банк депозитарийсининг ўзгариши;

-банк акциядорлари сони ҳақида маълумот;

-овоз бериш ҳуқуқига эга бўлган, шунингдек сотувда бўлган акциялар сони тўғрисида маълумот;

-банк акцияларига бевосита ёки билвосита эгалик қилувчи ва банк акциялари бўйича овоз бериш ҳуқуқини берадиган оддий акцияларнинг беш ёки ундан ортиғини ташкил қиладиган акциядорлари тўғрисида маълумот;

-банк томонидан ошкор этилиши маъқул деб ҳисобланган бошқа маълумотлар.

27.Банкнинг йиллик молиявий ҳисоботлари “Ўзбекистон Республикаси Марказий банки томонидан тижорат банкларининг чоп этиладиган йиллик молиявий ҳисоботларига қўйиладиган талаблар тўғрисида”ги Низом талабларига мувофиқ чоп этилади.

10-§.Банк томонидан ошкор этилган ахборотларга изоҳлар бериш

28.Аввалошкор этилган ахборотларга изоҳ бериш банкнинг масъул шахслари томонидан амалга оширилади.

29.Банк Кенгаши аъзолари Кенгаш йиғилишларида кўрилган масалалар бўйича изох беришлари мумкин. Банк фаолияти билан боғлиқ бошқа ҳолатларда эса банк томонидан ахборот ошкор этилгандан сўнг фақатгина ўз номларидан изох берадилар.

30.Бошқарув раиси ўз номидан ва банк Бошқаруви номидан изохлар бериши мумкин.

31.Банк ҳақидаги миш-миш гап сўзлар банк ахборот сиёсатининг предмети бўлиб ҳисобланмайди. Барча миш-миш гап сўзларга банкнинг масъул шахслари “ахборот сиёсати миш-миш гап-сўзларга изох бермасликка йўл қўяди” деб изох беришлари мумкин.

Юқоридаги миш-миш гап сўзларга изох бермаслик агар мазкур миш-миш гап сўзлар банк ва акциядорларига зарар келтирадиган бўлса, банк масъул шахслари томонидан ҳаққоний бўлмаган ахборотни инкор этиш бўйича чораларни кўришга тўсқинлик қилмайди.

11-§.Ахборот ошкор қилишнинг бошқа кўринишлари

32.Давлат органларидан ташқари бошқа ташкилотлар талабномалари бўйича ахборот бериш амалдаги қонунчилик талабларига асосан амалга оширилади.

33.Ташқи аудиторлик компаниялари, маслаҳат ташкилотлари ва рейтинг тақдим этувчи бошқа ташкилотлар билан бўлган ўзаро муносабатда ахборот тақдим этиш улар билан тузилган шартнома ва амалдаги қонунчилик талабларига асосан амалга оширилади.

34.Инвесторлар ва аналитиклар билан ўзаро ҳамкорликда банк ахборот ошкоралигини кучайтиришга қаратилган бир қатор тадбирларни амалга ошириши мумкин, жумладан:

- банк фаолиятига доир пресс-релизлар тарқатиш;
- инвесторлар ва аналитиклар учун учрашувлар ва тақдимотлар ташкил этиш, шунингдек банкнинг масъул шахслари сафари вақтида;
- конференц-қўнғироқлар;
- ОАВларида нашрлар, банк веб-сайтидаги янгиликлар.

12-§.Банкнинг расмий веб-сайтида ахборотларни ошкор этиш

35.Банкнинг расмий веб-сайти информацион-телекоммуникацион “Интернет” тармоғида банк ахборотини ошкор қилишнинг асосий манбаи бўлиб ҳисобланади. Банк веб-сайтида банк фаолияти тўғрисидаги объектив ахборотлар жойлаштирилади.

36.Банк тўғрисида ошкор қилинаётган ахборотлар информацион-телекоммуникацион “Интернет” тармоғида ўзбек, рус ва инглиз тилларида жойлаштирилади.

37.Банк веб-сайтида мажбурий жойлаштирилиши керак бўлган ахборотлар:

- банк фаолиятининг предмети ва мақсадлари;

-банк устави шу жумладан, унга ўзгартириш ва кўшимчалар ҳамда тасдиқланган бизнес-режалари;

-банкни ривожлантиришнинг қисқа ва узоқ муддатли стратегияси тўғрисидаги ахборот;

-банкнинг ташкилий тузилмаси, унинг таркибий бўлинмалари, филиаллари, шуъба хўжалик жамиятларининг номи, уларнинг телефонлари рақамлари, манзили (почта ва электрон манзиллари), уларнинг иш тартиби тўғрисидаги маълумотлар;

-банк раҳбарлари (Кенгаш раиси ва бошқарув раиси) тўғрисидаги маълумотнома-ахборот;

-бўш иш ўринлари, ишга қабул қилиш шартлари ва номзодларга қўйиладиган талаблар тўғрисидаги маълумотлар;

-банк ёки унинг Бошқарув органлари томонидан тузилган коллегиял ва маслаҳат органлари (Комиссиялар, Кенгашлар, Қўмиталар ва бошқалар) тўғрисидаги маълумотлар;

-банкнинг аффилиланган шахслари рўйхати;

-корпоратив бошқарув масалалари бўйича банкнинг ички ҳужжатлари, шу жумладан, акциядорларнинг умумий йиғилиши томонидан тасдиқланган Корпоратив бошқарув кодекси (у мавжуд бўлганда);

-“Қимматли қоғозлар бозори тўғрисида”ги Ўзбекистон Республикаси Қонунининг 44-моддасига мувофиқ ошкор қилиниши керак бўлган банк фаолиятидаги муҳим фактлар;

-акциядорларнинг умумий йиғилишида қабул қилинган қарорлар бўйича овоз бериш яқунлари;

-акциядорларнинг умумий йиғилиши ўтказилиши, санаси, вақти, ўтказиладиган жойи, кун тартиби тўғрисидаги маълумотлар;

-қимматли қоғозлар эмиссияси проспеклари, шунингдек қимматли қоғозлар бозори тўғрисидаги қонун ҳужжатларига мувофиқ ошкор қилиниши керак бўлган банкнинг чораклик ва йиллик ҳисоботлари;

-банк томонидан ўтказиладиган оммавий тадбирлар (мажлислар, кенгашлар, учрашувлар, матбуот конференциялари, семинарлар ва брифинглар, давра суҳбатлари, расмий ташрифлар) тўғрисидаги маълумотлар, пресс-релизлар ва кундалик фаолият тўғрисидаги бошқа ахборот;

-банк томонидан кўрсатиладиган хизматлар рўйхати ҳамда улар тўғрисидаги маълумотлар;

-товарларни етказиб бериш (ишларни бажариш, хизматлар кўрсатиш) бўйича банк ва унинг ташкилотлари томонидан ўтказиладиган очик танловлар (тендерлар) ва кимошди савдолари тўғрисидаги маълумотлар;

-банкнинг молия-хўжалик ҳолатини ва уни ривожлантириш динамикасини тавсифловчи асосий кўрсаткичлар тўғрисидаги муҳим маълумотлар, банк фаолияти тўғрисидаги ахборот тусидаги таҳлилий шарҳлар;

-охирги уч йилда ҳисобланган ва тўланган дивидендлар, шу жумладан, қарздорлик миқдори тўғрисидаги маълумотлар, акциядорлар томонидан дивидендларни олиш учун боғланиш маълумотлари ва бошқа маълумотлар;

-йиллик молия-хўжалик фаолиятини текшириш натижалари бўйича аудиторлик ташкилотининг хулосаси ва халқаро стандартларга мувофиқ тайёрланган молиявий ҳисобот;

-банк томонидан акциялар сотиб олинishi тўғрисидаги маълумотлар;

-корпоратив веб-сайтдаги ахборот материалларидан бошқа шахслар фойдаланганда банкнинг корпоратив веб-сайтига мажбурий ҳаволалар кўрсатилиши тўғрисидаги талаб;

-банкнинг корпоратив веб-сайтида жойлаштиришни банк зарур деб ҳисоблайдиган бошқа маълумотлар.

38. Банк веб-сайти мазмунига қўйиладиган талаблар:

-жойлаштирилган ахборот ишончли бўлиши ва банк фаолиятини холисона ёритиши;

-Банкнинг корпоратив веб-сайтида банк сирига ва хизматда фойдаланиш учун тегишли бўлган ахборот, шунингдек қонун ҳужжатларига мувофиқ эълон қилиш ва тарқатиш тақиқланган бошқа ахборот бўлмаслиги керак.

13-§. Бошқарув органлари аъзолари, мансабдор шахслар ва ходимларнинг мафаатдор шахслар билан ахборот алмашинув тартиби

39. Бошқарув органлари аъзолари, мансабдор шахслар ва ходимларнинг мафаатдор шахслар билан ахборот алмашинувини амалга ошириш бўйича масъул ходим тайинланади.

40. Манфаатдор шахслар томонидан ахборот тақдим этиш бўйича ёзма (электрон) мурожаат тақдим этилганда, масъул ходим мазкур Низомга мувофиқ бир ҳафта мобайнида агар қонунчиликда бошқа муддат белгиланмаган бўлса, барча керакли ахборотларни электрон кўринишда тақдим этади.

41. Ҳужжатларнинг нусхалари тақдим этилиши лозим бўлган ҳолларда ҳужжатларнинг нусхаларини тайёрлаш ва почта орқали жўнатиш билан боғлиқ харажатлардан ошмаган миқдорда манфаатдор шахслар томонидан тўлов амалга оширилади.

42. Акциядорлик талабига кўра акциядорлар ва инвесторларга зарур бўлган муайян (махфий ва тижорат сирини бўлган ахборотлардан ташқари) ахборотлар имкон қадар қисқа муддат ичида тақдим этилади.

43. Акциядорлар банк ва банк фаолияти билан боғлиқ ҳамда хизмат ва тижорат сирини ҳисобланган маълумотларни, қонунчиликка мувофиқ сир сақланадиган бошқа ахборотларни ошкор этиш ҳуқуқига эга эмас.

14-§. Ахборот сиёсатига амал қилиш бўйича назоратни таъминлаш чора-тадбирлари

44. Ушбу Низомда кўрсатилган Ахборотни ошкор қилишга ва оммавий ахборот воситаларида банк ҳақида ахборотни ошкор қилишга жавобгар шахсларнинг корпоратив котиби ёки акциядорлар билан корпоратив муносабатларнинг Бошқарувдаги масъул ходими, бухгалтер, шунингдек, ваколат берилган бошқа шахслар ҳисобланади.

Бошқарув раиси ва унинг ўринбосарларидан ташқари бошқа шахслар банк номидан чиқиш қилиш ҳуқуқига эга эмас.

45. Ахборотларнинг тўлиқлик, ишончлилик ва ўз вақтида ошкор этилиши бўйича жавобгарлик Бошқарув раиси зиммасига юклатилади.

46. Банк Бошқаруви ушбу Низом талабларининг ижроси бўйича ҳар чоракда банк Кенгашига ҳисобот тақдим этади.

15-§. Яқуний қоидалар

47. Мазкур Низомга асосан ошкор этилаётган ахборотнинг ишончлилиги ва унинг ҳолатига жавобгарлик банк Бошқаруви зиммасига юклатилади.

48. Ахборотнинг сифатли, ишончли, ўз вақтида ва тўлиқ ошкор этилиши банк Бошқаруви фаолиятининг самарадорлигини баҳоловчи мезонлардан ва унга бериладиган мукофотлашнинг шартлари бири бўлиб ҳисобланади.

49. Ушбу Низом талабларини бузган шахслар белгиланган тартибда жавобгарликка тортиладилар.

50. Ушбу Низом банк Кенгаши томонидан тасдиқланади.

51. Ушбу Низомга ўзгариш ва қўшимчалар киритиш банк Кенгаши қарорига асосан амалга оширилади.

52. Ушбу Низомнинг алоҳида моддалари Ўзбекистон Республикаси амалдаги қонунчилиги ёки банк Уставига зид бўлса, ушбу моддалар ўз кучини йўқотади ва ушбу моддаларга ўзгартиришлар киритилгунга қадар банк Устави ва Ўзбекистон Республикасининг амалдаги қонунчилиги нормаларига амал қилинади.